

Ang Panginahanglan nga Magtinguha ang Katawhan sa Dios sa Paggiya sa Ginoo ug Maanaay Presensya sa Ginoo aron Ipasundayag ang Iyang Pagdaog aron Matukod ang Iyang Lawas ug Mapakaylap ang Iyang Gingharian

Basahong Kasulatan: Mat. 1:5; Jos. 6:22-26; 7:1-6, 10-15, 20-21; 9:14

- I. **Sa pag-abot sa duha ka espiya sa Jerico, gikontak sila ni Rahab (nga puta ug Canaanhon) ug andam siyang modawat, motago, ug moluwas nila pinaagi sa mga buhat nga lugwa sa iyang pagtuo (Jos. 2:1-7, 15-16, 22; Sant. 2:25); nituo siya sa Dios sa Israel ug nipahayag nga, “Si Jehova nga inyong Dios, Siya ang Dios sa langit sa itaas ug dinhi sa yuta sa ilalom” (Jos. 2:11):**
 - A. Gitagana ni Jehova si Rahab nga puta kang Josue aron mapanag-iya ang yuta; tungod sa iyang pagtuo sa Dios, “wala [siya] malaglag uban sa mga masupilon” (Heb. 11:31); nidangop siya sa Israel ug sa ilang Dios, ug nisalig siya Niya ug sa Iyang katawhan (Jos. 2:12-13).
 - B. Ang ilhanan aron maluwas si Rahab ug ang iyang panimalay pagbitay man niyag kutay sa escarlatang hilo sa bintana sa iyang balay (vv. 18, 21); ang escarlatang hilo nga gihigot sa bintana naghulagway sa dayag nga pag-ila sa nagtubos nga dugo ni Cristo (1 Ped. 1:18-19); nituo siya nga pinaagi ning ilhanana maluwas siya ug ang iyang panimalay.
 - C. Bisan Canaanhong hinukman si Rahab ug puta sa Jerico (Jos. 2:1), nga dapit nga tinunglo sa Dios hangtod sa eternidad (6:26), sa nidangop siya sa Dios ug sa Iyang katawhan (vv. 22-25; Heb. 11:30-31), naminyo siya ni Salmon (Mat. 1:5), nga anak nga lalaki sa lider sa Juda, nga nangunang banay sa Israel (1 Cron. 2:10-11), ug malagmit usa sa duha ka espiya; unya nanganak siya ni Boaz, nga diosnong tawo, nga nahimong ginikanan ni Cristo, ug nalambigit siya ni Cristo sa Iyang pagpakatawo aron matuman ang walay kataposang pamatigayon sa Dios (Mat. 1:5).
 - D. Nagpakita kini nga bisan unsa pay atong kagikan, kon modangop ta sa Dios ug sa Iyang katawhan ug mahiusa sa hustong tawo diha sa katawhan sa Dios (dili sa pisikal nga bahin kondili sa espirituhanong bahin), makapahimugso tag hustong bunga ug makaapil sa pagpahimulos sa katungod sa pagkapanganay ni Cristo—Exo. 24:13; 33:11; Num. 27:18; Deut. 34:9; Jos. 1:1; 2 Hari 2:2-15; Fil. 2:19-23; 1 Cor. 4:17.
- II. **Sa nalaglag na ang Jerico, napildi ang Israel didto sa Ai; didto sa Jerico, segun sa pamatigayon sa Dios, nagpadalag mga espiya si Josue, dili aron makig-away kondili aron mabatonan si Rahab; apan didto sa Ai, kay nawad-an man ang Israel sa presensya sa Ginoo (Jos. 7:12), nagpadalag mga espiya si Josue aron makig-away (vv. 2-3):**
 - A. Nagpakita ang taho sa mga espiya ngadto ni Josue kalabot sa Ai nga gipadaplin sa Israel ang Dios; imbis mangutana sa Dios kon unsay angay nilang buhaton batok sa Ai, gikalimtan nila ang Dios ug nagtagad ra sa ilang kaugalingon; niadtong panahona wala sila mausa sa Dios, nibuhat hinuon sa ila rang kaugalingon, wala magpatudlo sa Ginoo ug walay presensya Niya; nabulag ang Israel sa Dios tungod sa ilang sala—vv. 1-5, 12:
 1. Ang sekreto sa pagkapildi sa Israel didto sa Ai mao nga nawad-an sila sa presensya sa Dios ug wala na mausa sa Dios; sa napildi na nakat-on si Josue

- nga magpabilin uban sa Ginoo atubangan sa Arka (v. 6); sa kaulahian, namulong ang Ginoo kaniya ug gisultian siya kon unsay buhaton (vv. 10-15).
2. Ang espirituhanong pagtulon-an nga kat-onan gyod nato ning hitaboa mao nga kita, nga katawhan sa Dios, kinahanglan mausa gyod kanunay sa atong Dios, nga dili lang naa sa atong taliwala kondili naa sab sa sulod nato, naghimo natong mga tawo nga dunay Dios—mga Dios-tawo
 3. Kay mga Dios-tawo man, magbatasan gyod ta nga mausa sa Ginoo, maggawi uban Niya, magkinabuhi uban Niya, ug ibutang ang tibuok natong pagkatawo Kaniya; kini ang paggawi isip Cristohanon, ang pagpakig-away ingog anak sa Dios, ug ang pagtukod sa Lawas ni Cristo.
 4. Kon naa nato ang presensya sa Ginoo, duna tay kaalam, sulodnong pagpanabot, panlantaw sa unahan, ug kahibalo sa sulod kalabot sa mga butang; ang presensya sa Ginoo maoy tanan alang nato—2 Cor. 2:10; 4:6-7; Gal. 5:25; Gen. 5:22-24; Heb. 11:5-6.
- B. Kon buot tang makasulod, makapanag-iya, ug makapahimulos sa malangkobon-sa-tanan nga Cristo nga realidad sa maayong yuta, buhaton gyod nato kini pinaagi sa presensya sa Ginoo; gisaaran sa Ginoo si Moises nga, “Mag-uban nimo ang Akong presensya, ug papahulayon ka Nako” (Exo. 33:14); ang presensya sa Dios mao ang Iyang paagi kun dalan, ang “mapa” nga magpakita sa Iyang katawhan sa dalan nga angay nilang lakwan:
1. Aron hingpit natong mabatonan ug mapanag-iya si Cristo nga malangkobon-sa-tanan nga yuta alang sa pagtukod sa Dios, kuptan gyod nato kining prinsipyoha: ang presensya sa Dios maoy basihananan sa tanang butang; bisan unsa pay gibuhat nato, magtagad gyod ta kon naa ba nato ang presensya sa Dios o wala; kon naa nato ang presensya sa Dios, naa nato ang tanan, apan kon mawad-an ta sa presensya sa Dios, mawad-an ta sa tanan—Mat. 1:23; 2 Tim. 4:22; Gal. 6:18; Sal. 27:4, 8; 51:11; 2 Cor. 2:10; Ezeq. 48:35.
 2. Ang presensya sa Ginoo, ang pahiyom sa Ginoo, maoy nagdumalang prinsipyo; makat-on gyod unta ta nga magpaamping, magpabuot, magpadumala, ug magpagiya, dili sa segunda manong presensya sa Ginoo kondili sa direkta, primera manong presensya Niya; ang bililhong presensya Niya mao ang gahom nga makapapanag-iya nato sa malangkobon-sa-tanan nga Cristo nga realidad sa maayong yuta nga nagpaagay sa gatas ug dugos—Exo. 3:8; 25:30; Deut. 26:9; Ezeq. 20:6.
 3. “Sa batan-on pa ko gitudloan ko sa nagkalainlaing paagi nga makadaog, magmadaogon, mabalaan, ug maespiruhanon. Apan walay usa ning mga paagiha nga nagpulos. Sa kapulihay, pinaagi sa kapin sa kan-umag walo ka tuig nga pagsinati, nakaplagn nako nga walay magpulos kondili ang presensya ra sa Ginoo. Ang pag-uban Niya kanato maoy tanan”—*Life-study of Joshua*, p. 48.
- C. Sa nakasulod na ang mga Israelinhon sa yuta sa Canaan ug nakadaog sa Jerico, ang unang nakasala mao si Achan; ang tiunay, espirituhanong kahulogan ug diosnong panan-awon sa bug-at nga sala ni Achan mao ang pagkaibog niya sa nindot nga Babilonihanong bisti (ang Shinar mao ang dapit nga sa ngadtongadto ginganlag Babilonia) sa tinguha niya nga moarang-arang siya, mas gwapo tanawon aron magmaayo ang panagway—Jos. 7:21:
1. Nakasala si Ananias ug si Safira, nga namakak sa Espiritu Santo, sa mao rang prinsipyo—sa prinsipyo sa Babilonia, nga mao ang pagminaot—Buh. 5:1-11; Bug. 17:4, 6; Mat. 23:13-36:
 - a. Wala kaayo sila mahigugma sa Ginoo, apan gusto silang isipon nga mga

tawong nahigugma pag-ayo sa Ginoo; nagpakaaron-ingnon lang sila; kina-
hanglan gyong maluwas ang mga anak sa Dios sa pagpakaaron-ingnon
atubangan sa mga tawo.

- b. Dili sila gustong malipayong mohalad sa tanan ngadto sa Dios, apan atu-
bangan sa mga tawo nagpakaaron-ingnon sila nga gihalad nila ang tanan;
magsul-ob ngani tag bisti nga wala mohaom sa aktwal natong kahimtang,
naa ta sa prinsipyo sa Babilonia—6:1-6; 15:7-8.
2. Tanang gibuhat sa pagpamakak aron himayaon sa tawo gibuhat man sa
prinsipyo sa puta, dili sa prinsipyo sa pangasaw-onon; mga sala ang mini nga
paghalad ug pagkaespirituhanon, apan naa sa espiritu ug pagkamatinud-
anon ang tinuod nga pagsimba; himoon unta ta sa Dios nga tinuod nga mga
tawo—Bug. 17:4-5; 19:7-9; Luc. 12:1; 1 Cor. 2:9-10; 2 Cor. 2:10; 5:14-15; Juan
4:23-24.
3. “Dili ang tinan-awan sa tawo ang mahinungdanon; kay nagtan-aw ang tawo
sa dayag nga panagway, apan nagtan-aw si Jehova sa kasingkasing” (1 Sam.
16:7); kon tipigan nato ang pulong sa Dios sa atong kasingkasing (Sal.
119:11) ug papuy-on si Cristo sa atong kasingkasing (Efe. 3:16-17), mahimo
Siyang maayong bahandi sa atong kasingkasing, ug gikan sa kadagaya sa
atong kasingkasing ikapaambit nato Siya sa uban isip matahom, maayong
bahandi (Luc. 6:44-45).

III. Sa nabatokan na sa Israel ang ilang sala, ang sala ni Achan (Jos. 7:11-12, 20-21), nagmadaogon sila sa Ai (8:1-35), apan dunay rekord nga nalimbongan sa mga Gibeonhon ang mga anak sa Israel (9:1-27):

- A. Mga Hibehanon ang mga Gibeonhon (vv. 3, 7; 11:18-19)—usa sa mga nasod sa
yuta sa Canaan nga puohon gyod sa Israel kay yawan-on sila ug nasagolag mga
demonyo (Deut. 7:2; 9:4-5; 18:9-14); maigmat nga gilimbongan sa mga lumu-
lupyong sa Gibeon ang Israel (Jos. 9:3-14).
- B. Kay nakadungog man sila nga gipildi sa Israel ang Jerico ug Ai, buot silang
makigdait ug makigsaad sa Israel aron buhion sila sa Israel; nangadto sila ingog
mga sinugo ug nagpakaaron-ingnon nga gikan sa layo; nangadto sila ni Josue sa
kampo sa Gilgal ug niingon niya ug sa mga tawo sa Israel, “Gikan mi sa layong
yuta...Mahimo ming mga sulugoon ninyo; busa karon maghimo mog pakigsaad
uban namo” (vv. 6, 11).
- C. Kusganon kaayong bahin sa Kasulatan ang Josue 9:14 nga nagpakita nganong
nalimbongan ang mga anak sa Israel sa mga Gibeonhon—“wala sila magpatam-
bag ni Jehova”; busa, nakigdait si Josue kanila ug naghimog pakigsaad uban
nila nga buhion sila (v. 15):
 1. Nalimbongan ang mga anak sa Israel kay sama sila sa asawang nakalimot
sa iyang bana; diosnong sugilanon sa gugma ang tibuok Biblia, rekord sa
pagpangulitawo sa Dios sa Iyang piniling katawhan ug sa kapulihay pagpa-
kigminyo kanila (Gen. 2:21-24; A. S. 1:2-4; Isa. 54:5; 62:5; Jer. 2:2; 3:1, 14;
31:32; Ezeq. 16:8; 23:5; Os. 2:7, 19; Mat. 9:15; Juan 3:29; 2 Cor. 11:2; Efe.
5:25-32; Bug. 19:7; 21:2, 9-10; 22:17).
 2. Gipakita sa Biblia kanato nga kita, nga mga pinili sa Dios, asawa Niya ug
tali Niya ug nato duna gyoy pagkausa sa kaminyoon nga naghinigugmaay;
busa, dapit sa kasal ang uniberso, dapit diin gikasal ang Bana, ang nahikay
ug nahingpit nga Tulo-usang Dios, sa tinubos, gipanganak pag-usab, giba-
laan, gibag-o, gitransporma, ug gihimayang tawo nga may tulo ka bahin;
sa kapulihay, natapos ang Biblia sa Bag-ong Jerusalem nga kinataposang

kahingpitan sa piniling katawhan sa Dios sa bag-ong langit ug bag-ong yuta, isip unibersohanong asawa hangtod sa eternidad—21:9-10; 22:17.

3. Dili gyod angay mobiya sa iyang bana ang asawa; kanunay gyod unta hinuon siyang magsalig ug mausa sa iyang bana; sa pag-adto sa mga Gibeonhon sa Israel, isip asawa niadto gyod unta ang Israel sa iyang Bana ug nagpakisayod Niya kon unsay buhaton—Jos. 9:14.
4. Isip mga magtutuong nahigugma sa Ginoo ug nagtinguha nga mahimong mga inug-umol sa madaogong pangasaw-onon Niya, mokonsulta gyod ta sa Dios kalabot sa tanang problema nga mahinagbo nato; dad-on gyod nato sa Ginoo ang tanang butang ug hunahunaon, susihon, ug tinoon ang mga butang sa Iyang atubangan ug makig-ambitay Niya:
 - a. Kalabot niini, kinahanglan gyong mahimong maluyahon ang tagsatagsa ka magtutuo hangtod nga wala na siyay kaugalingong mga ideya, dili na mohimo sa kaugalingon niyang mga desisyon, o mobuhat bag bisan unsa kalabot sa nahinagbo niya nga dili mokontak ug mokonsulta sa Ginoo, nga Siyay padesisyonon; kini ang labing matahom nga pagkinabuhi sa Cristohanon—2 Cor. 12:9-10.
 - b. Wala tay laing mahimo kondili makig-ambitay sa Dios sa tanang butang, maghisgot-hisgot sa tanang butang uban Niya, ug paatimanon Siya sa tanang butang, papamulongon sa tanang butang, ug padesisyonon sa tanan; mahimayaon alang sa Cristohanon nga magsalig sa usa pa ka Persona—sa Dios—sa tanang gutlo ug sa tanang butang—Fil. 4:6-7; Prov. 3:5-6; Jer. 17:7-8; 2 Cor. 1:8-9; Sal. 62:8; Sal. 102, titulo ug v. 7.
5. Kon dad-on ka sa Dios nga molakaw sa dalan nga wala nimo masayri, “magpugos kini nimo nga makigsultianay Niya sa gatosan ug linibo ka higayon, nga moresulta sa panaw nga walay kataposang handomanan tali nimo ug Niya”—*The Collected Works of Watchman Nee*, vol. 7, p. 1144.
6. Ang resulta sa wala pagpatambag sa Israel sa iyang Bana mao nga nalimbongan kining independente ug makinaugalingong asawa, ug wala siyay panalipod; gikan ning rekord sa Kasulatan, makat-on gyod unta ta nga, kay asawa man sa Ginoo, magkinabuhi gyod ta uban Niya, kanunayng magsalig Niya ug mausa Niya sa tanang panahon; kini ang tiunayng kahulogan sa Josue 9.